



Arenòsi

Huelheton deth Conselh Generau d'Aran

AUÉ en AVUI tà tota Catalonha

Vesins dera Val d'aran

Laguens des nòstes competéncias de promocion der aranés auem artenhut un acòrd damb eth diari AVUI que mos permeterà auer ua incidéncia enes mieis de comunicacion fòrça mès importanta dera qu'auiem enquia ara. Setmanaument, toti es dissabtes, se publicarà AUÉ, suplement en aranés deth diari AVUI, que se distribuirà per tota Catalonha damb eth madeish diari. Damb açò artenhem a facilitar era lectura dera nòsta lengua e era difusion dera nòsta realitat en un ambit fòrça important.

Aguest AUÉ servirà tanben de difusion dera nòsta terra des d'un punt d'enguarda toristic. Se facilitarà a toti es poblants de Catalonha ua informacion setmanau sus eth nòste país en tot hè-les-ac atractiu. Ei damb acòrds e accions com aguesta que perseguim ua consolidacion der atractiu toristic aranés e ua promocion dera nòsta realitat identitària e dera nòsta lengua e cultura.

Ei per açò que demoram de toti es aranesi ua plan bona acuelhuda d'aguesta iniciatiua que comencèc a èster ua realitat eth dia 7 de març e que la traparatz toti es dissabtes.

Carlos Barrera
Sindic d'Aran

TITOLARS:

AUÉ en AVUI tà tota Catalonha

(Plana 1)

Corsi gratuïts entà treballadors de formacion contunha.

(Plana 2)

Detzau aniversari deth Meddia Aranés.

(Plana 2)

1èra concentracion motèra en Bossòst

(Plana 3)

Plan estrategic deth Naut Pirenèu de Catalonha.

(Plana 3)

432 participants en "Era Baishada".

(Plana 3)

Concèrt de primavera ena Glèisa de Sant Miquèu de Vielha.

(Plana 4)

Liegetz era informacion dera Val d'Aran en AUÉ

(Plana 4)

impresi sense adreça

Depòsit Legau: L-516-1994
15-03-98/Num.: 39



CORSI GRATUÏTS ENTÀ TRABALHADORS DE FORMACION CONTUNHA

TRABALHADORS D'OSTALARIA

CORS DE TECHNIQUES DE CATA DE VINS

Eth cors s'inicie eth 16 de març enquiath 20 de març, damb eth següent orari:
de 16:00 ores a 20:40 ores dera tarde en Hotèl Tuca de Betren.

CORS DE CODINA CREATIUA

Comence eth dia 23 de març damb ua durada de 15 ores, enquiath 27 de març,
eth lòc e er orari se definirà mès endeuant.

Es oraris des corsi pòden èster modificats, e per aquerò era organisacion demane
es vòstes suggeréncias entà definí-les mielhòr entà toti.

Era inscripcion demore dubèrta, ena sedença deth Conselh Generau d'Aran o ben
en telefon num. 973 64 18 01 tà totes aqueres personas que i siguen interessades.

Detzau aniversari deth Meddia Aranés

Eth pròplèu dia 26 de març eth programa "Meddia Aranés" de Catalonha Informacion
en Aran complirà dètz ans d'existéncia. Per aquest motiu an premanit un programa
especial que poiram escotar eth madeish dia, entàs dotze de meddia e entàs sèt
dera tarde, a on reflexaram quauqui uns des hèts mès subergessenti des darrèri dètz
ans en Aran en tot escotar era votz des sòns protagonistes. Eth programa remassarà
tanben es cambis que pendent aquest temps s'an produsit ena programacion deth
"Meddia Aranés". Damb motiu deth detzau aniversari eth programa a organisat ua
sèrie de concorsi (diboishi, slògans, auques, redaccions, eca.) que seràn premiadi e
divulgadi a traucers de Meddia Aranés e que s'expausaràn ena entrada deth Palai de
Gèu de Vielha; es prèmis s'autrejaràn eth dia 26 laguens dera emission deth progra-
ma.

Eth dia 27 de març de ueit deth maitin a dotze de meddia, des deth cine de Vielha e
entà tota Catalonha s'emeterà eth programa "El Matí de Catalunya Ràdio" amiat per
Antoni Bassas, qu'inclurà ahèrs e personatges d'Aran. Toti aqueri que desiretz veir
coma se hè un programa de ràdio en dirècte i ètz convidadi.

23 e 24 de mai
1èra. concentracion motèra

FREEDOM BIKER

En Bossòst, Val d'Aran - Lhèida

Per sonque **2500 pts.** en camping «**ES PALIÀS**» damb parcatge, piscina e doches.

I aurà jòcs, rota baritima, sopar (sardinada e bièra...) e esdejuar.

Assistència de «**SUNN TATTOO*PIERCING**» de Lhèida e Barcelona.

Seràn damb nosati amics deth Motoclub Caball de Ferro, tocarà eth grop «**No Retornables**».

Entrèga de trofèus a toti es guanhadors de concorsi.

Entrèga de samarreta a toti es concentrats.

Entrada entà veir es jòcs e actuacions 500 pts.

Dia limit d'inscripcion 13 de mai, ingressar es sòs en num. de compde

2100-0223-11-0100289255 dera Caixa d'Estauvis e Pensions de Barcelona.

Telefon de contacte **929787919** *en tot demanar per Rei.*

Sauvar eth resguard bancari entà justificar eth pagament.

S'admeten tota sòrta de mòtos.

Discotèca **ELURRA** convida a un **CHUPITO**

DEPORTUR realisarà baishades de Rafting (demanar prètz)

IMPORTANT

SE REALISARÀN TATTOOS & PIERCING AR ACTE

**Eth Departament de politica territorial d'Òbres Publiques
dera Generalitat de Catalunya presentèc eth passat mes
de hereuèr eth sòn plan Estrategic deth Naut Pirenèu de
Catalonha.**

En aquest plan se definissen es èishi e formes d'actuacion qu'an de perméter reforçar es activitats especificas d'aquesti sectors entà fomentar era competitivitat laguens deth territòri catalan.

Es principaus prepauses deth Plan van adreçadas ara potenciacion e proteccion deth miei naturau, uman e culturau coma base indispensable entara promocion toristica industriau e agrària qu'an de perméter era mielhora dera qualitat de vida d'aquesti sectors en tot preservar eth miei naturau e eth patrimòni culturau.

**Era Val d'Aran siguec era gran protagonista dera baishada,
a on i participèren mès de 430 esquiadors.**

Es esquiadors aranesi des culbs CEVA, CAEI e Escòla d'Esquí Baquèira Beret sigueren es grani daminars dera 5au. edicion d'Era Baishada que se celebrèc eth passat dissabte dia 6 de març. Es guanhadors dera pròva sigueren: Ena categoria senior era esquiadora aranesa Noemí Muñoz deth CEVA, en gran guanhador absolut siguec Rafèl Mombiedro deth CAEI. Ena categoria juvenil guanhèren era pròva Elena Pujol e David Mora deth CEVA, en dusau lòc demorèren Christian Delclos e Sònia Anadon deth CAEI.



CONCÈRT DE PRIMAVERA

Dissabte 21 de març

Glèisa de Sant Miquèu de Vielha tàs 20,30 ores.

**ORQUÈSTRA DES ALUMNES
DERA ESCÒLA NACIONAU
DE MUSICA DE PAU E ERA
CORAU "ANIMA".**

damb un totau de 35 musics e 40 veus

ENTRADA DE FRANC

**LIEGETZ ERA INFORMACION DERA VAL D'ARAN
EN AUÉ LAGUENS DETH DIARI AVUI**

Eth dia 16 de març entàs 12,00 ores deth maitin se harà era presentacion oficiau pera Promotora Catalana S.A. Editora deth diari AVUI e eth Conselh Generau d'Aran deth suplement AUÉ que ges a compdar deth 7 de març passat cada dissabte laguens deth diari AVUI.